

Morning Regional Dogri News Bulletin, 02nd April 2024

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. विदेश मंत्री डॉ. एस.जयशंकर होरें आक्खेआ ऐ जे पाकिस्तान कन्ने बपार दा इच्चर कोई संभावना नेई ऐ जिच्चर बन्ने पर तनोतनी बनी दी रौहग।
2. प्रधानमंत्री होरें आक्खेआ ऐ जे भारत गी अगले 10एं ब'रें च आर्थिक रूपै च आत्म निर्भर बनने दी लोड़ ऐ तां जे वैश्विक पैहलुएं दा मुल्खै पर मता असर नेई पवै।
3. जम्मू कश्मीर सरकार नै 5एं लोकसभा हल्के च मतदान आले रोज छुट्टी दी घोशणा कीती ऐ।
4. मुख् सचिव अटल डुल्लू होरें इस ब'रे दी श्री अमरनाथ जी दी यात्रा आस्तै प्रशासन दी तैआरिं दा जायजा लैता ऐ।
5. पुलस महानिदेशक होरें आक्खेआ ऐ जे लोकसभा चुनाएं च सुरक्षत माहौल जकीनी बनाने आस्तै गैई पुट्टियां जा'रदियां न।

<><><><><><>

EAM

विदेश मंत्री डॉ. एस.जयशंकर होरें आक्खेआ जे जिसलै तगर बन्ने पर तनाह बने दा ऐ उसलै तगर पाकिस्तान कन्ने बपार दी कोई संभावना नेई ऐ। डॉ. जयशंकर होर सूरत दे Southern Gujrat Chamber of Commerce & Industry आस्सेआ भारत इक उभरदी अर्थ-बवस्था विशे पर आयोजित कार्यक्रम गी संबोधत करा'रदे हे। उनें आक्खेआ जे आतंकवाद गी कुसै बीरूपै च बरदाशत नेई कीता जाग। अरुणाचल प्रदेश पर चीन दे दावें गी खारज करदे होई विदेश मंत्री होरें आक्खेआ जे अरुणाचल प्रदेश भारत दा इक राज्य ऐ ते म्हेशां रौहग ते कोई ना बदलने कन्ने एह तथ्य बदली नेई सकदा। केन्द्रीय मंत्री किरिन रीजीजू होरें अरुणाचल प्रदेश दी 30 थाहरें गी चीन आस्सेआ गैर कनूनी तरीके कन्ने भौगोलिक नां दित्ते जाने दी सख्त निंदेआ कीती ऐ। रीजीजू होरें इक सोशल मीडिया पोस्ट च आक्खेआ जे चीन बे-बुनियाद दावे करा'रदा ऐ पर एहदे कन्ने जमीनी हकीकत ते ऐतिहासक तथ्य नेई बदलगन। उनें गलाया जे अरुणाचल प्रदेश भारत दा अननुट्ट हिस्सा ऐ ते म्हेशां रौहग।

<><><><><><>

PM-Modi

प्रधानमंत्री नरेन्द्र मोदी होरें कल आक्खेआ जे भारत गी अगले 10एं ब'रें च आर्थिक तौर पर आत्म निर्भर बनने दी लोड ऐ तां जे देसै पर वैश्विक पैह्लुएं दा मता असर नेई पवै। भारती रिजर्व बैंक दे 90में स्थापना दिवस पर मुंबई च इक समारोह गी संबोधत करदे होई प्रधानमंत्री होरें आक्खेआ जे भारती बैंकिंग सेक्टर दा परिवर्तन अध्ययन दा विशे ऐ। उनें आक्खेआ जे बैंकिंग सेक्टर नफे आला बनी गोआ ऐ ते उंदी सरकार ते आरबीआई दे उपाएं मगरा दुआरें दी स्थिति च बढ़ौतरी होआ'रदी ऐ।

<><><><><><>

Holiday Poll

जम्मू कश्मीर सरकार नै प्रदेश दे 5एं संसदी हल्कें च मतदान आले ध्याड़े आम छुट्टी दी घोषणा कीती ऐ। हुक्म च कुसै बी कारोबार, उद्योगी प्रतिष्ठान जां होर इदारें च कम्म करने आले सब्बने योग्य मतदाता आस्तै बी मतदान दे ध्याड़े गी तन्खवाह युक्त छुट्टी घोषत कीता गोआ ऐ। एहदे च आक्खेआ गोआ ऐ जे ध्याड़ीदार ते कैजुअल वर्कर बी इस दिन छुट्टी ते उजरत दे हक्कदार होंगन। हुक्मै मूजब 19 अप्रैल दे मतदान आले रोज उधमपुर संसदी हल्के च छुट्टी रौहग। जम्मू संसदी हल्के च 26 अप्रैल गी छुट्टी रौहग। उआं गै अनंतनाग—राजौरी संसदी हल्के च 7 मई गी श्रीनगर च 13 मई ते बारामुला संसदी हल्के च 20 मई गी मतदान आले रोज छुट्टी दी घोषणा कीती गई ऐ।

<><><><><><>

CEO

जम्मू कश्मीर दे मुख् चुनां अधिकारी पाडूरंग के.पोले होरें कल पुंछ जिले च चुनावी तैआरिएं दा व्यापक जायजा लैता। इस बैठक दा मकसद सोज—समेयान सरबंधी बंदोबस्तें, सुरक्षा तैआरिएं ते चुनावी प्रक्रिया लेई पूरी पराती तैआरिएं दा आंकलन करना हा। आकाशवाणी दे जम्मू संवाददाता नै जानकारी दिक्ती ऐ जे बैइका च चुनां तैआरिएं दे हर पैह्लु दे बारे च तफसीली सोच बचार कीता गोआ ते इक इक तैआरी दे बारे च पूरी पराती जानकारी हासल कीती गई जिंदे च चुनां अमले दे प्रबंधन सरबंधी योजना, जोखम प्रबंधन योजना, वोटिक मशीनें गी आनने लेई जाने दे इंतजाम, सुरक्षा कर्मी ते चुनां अगले दी तैनाती, बन्ने कन्नै लगदे ते अंदरूनी इलाकें च सुरक्षा बंदोबस्त बगैरा शामिल हे। मीटिंगै च बूथ सतह पर स्वीप योजना दी अमलावरी,

मनुक्खी वसीले दी दस्तेयावी, आओजाई दे रूट दी कुशल सुरक्षा जनेए कम्मं कारवाइएं बारे बी जानकारी मीटिंगै च सांझी कीती गई।

<><><><><><>

Div.Com

जम्मू दे डिवीजनल कमीशनर रमेश कुमार होरें कल रामबन जिले दा दौरा लाया ते जिले च राष्ट्रीय जरनैली सड़कै पर चलै करदे कम्मै दी रफतार ते प्रगति दा जायजा लैता। इस जायजा बैठक च रामबन दे जिला विकास कमीशनर होरें उनेंगी जिले च जम्मू श्रीनगर राष्ट्रीय जरनैली शिड़कै पर जारी कम्मं दे बारे च तफसीली जानकारी दित्ती। डिवीजनल कमीशनर होरें सरबंधत अधिकारिएं गी जोर देइयै आक्खेआ जे ओह इस गल्लै गी जकीनी बनान ते जारी कम्मं दे चलदे इस सड़कै परा लंघने आलिएं गडिडएं गी कोई दिक्कत परेशानी पेश नेई आवै ते कुसै बी सूरतै च गडिडएं दी आओजाई ब्हाल रखने लेई मशीनां ते अमला म्हेशां तैआर ते तैनात रखेआ जा। एहदे इलावा डिवीजनल कमीशनर होरें औंदे लोकसभा चुनां लेई जिला प्रशासन आस्सेआ कीती गेदिएं तैआरिएं दा बी समीक्षा कीती। जेहदे च फ्लाइंग स्क्वाड दियां टीमां, वीडियो राएं तक्क रखने आलियां टीमां, खर्च पर तक्क रखने आले निगरान ते चुनां आयोग दे निर्देशं मूजब तैआरियां शामिल न।

<><><><><><>

NC Altaf

नैशनल कांफ्रेंस नै अनंतनाग7राजौरी संसदी हल्के आस्तै साबका मंत्री मियां अल्ताफ होरें गी अपना मेदवार घोषत कीता ऐ। एह घोषणा करदे होई पार्टी दे उप-प्रधान उमर अब्दुल्ला होरें आक्खेआ जे इस हल्के आस्तै मियां अल्ताफ हुंदे थमां बेहतर मेदवार कोई नेई होई सकदा। दक्खनी कश्मीर थमां इस लोकसभा चुनां आस्तै अपना मेदवार घोषत करने आली नैशनल कांफ्रेंस पैहली पार्टी ऐ। इस संसदी हल्के च 7 मई गी वोट पाए जांगन।

<><><><><><>

CS-SANJY-2024

मुख्य सचिव अटल डुल्लू होरें सलाना श्री अमरनाथ जी दी यात्रा 2024 लेई प्रशासन आस्सेआ कीती जा'रदी तैआरिएं दी समीक्षा कीती। आकाशवाणी दे जम्मू संवाददाता नै जानकारी दित्ती ऐ जे यात्रा गी पूरी चाल्ली रमानदारी ते बवस्था आले ढंगै सिर तोड़ चाढ़ना जकीनी बनाने लेई सद्दी गेदी इक जायजा बैठक च पुलस महानिदेशक, प्रशासनिक सचिव, सरबंधत बक्ख-बक्ख जिलें दे डिप्टी कमीशनरें ते श्री अमरनाथ जी श्राईन

बोर्ड, सीमा सड़क संगठन बीआरओ, भारतीय मौसम विभाग, दूर संचार सुविधा उपलब्ध कराने आले ते आपदा प्रबंधन अजेंसिएं दे प्रतिनिधि ते विभाग अध्यक्ष बी मजुद हे। मुख्य सचिव होरें मैहकमा सेहत, जल शक्ति, बिजली विकास, पशुपालन, ट्रांसपोर्ट, खुराक, सार्वजनिक बंड बिक्री ते उपभोक्ता मामले सरबंधी मैहकमे ते सरबंधत होर दुए घडें, मैहकमें ते अजेंसिएं बारे तफसीली जानकारी हासल कीती।

<><><><><><>

DGP

पुलस दे महानिदेशक आर.आर.स्वैन होरें कल आखेआ जे चुनाएं दरान प्रदेश च सब्बने दी सुरक्षा जकीनी बनाने आस्तै गैई पुट्टियां जा'रदियां न। उनें दस्सेआ जे सब्बने सरबंधत घडें दी सुरक्षा आस्तै सुरक्षा बल दिन-रात कम्म करे करदे न। ओहू कठुआ दे पुलस ट्रेनिंग स्कूल च महिला पुलस कर्मिएं दी पासिंग-आउट परेड दे बाहरें पत्रकारें कन्नै गल्ल करै करदे हे। उनें आखेआ जे पुलस केन्द्र ते एहदे अजेंसिएं कन्नै रलियै इस लोकतांत्रिक प्रक्रिया च अपनी भूमका नभा करदी ऐ। उनें आखेआ जे सुरक्षा मात्र रूतबे दा प्रतीक नेई होनी लोडचदी सगुआं जरूरत दी बुनियाद आला मामला होनी चाहीदी ऐ। इक मिसाल दिंदे होई उनें आखेआ जे यूरोप च पुलस प्रमुख शडे दो सुरक्षा कर्मिएं गी कन्नै लेइयै चलदे न। पर असेंगी इस स्थिति तक्कर पुज्जने च समां लग्गोग।

<><><><><><>

LG-Meets

उपराज्यपाल मनोज सिन्हा होरें कल राजभवन जम्मू च युवा खोजकर्ता मास्टर करमान सिंह कन्नै मलाटी कीती। आकाशवाणी जम्मू दे संवाददाता नै दस्सेआ ऐ जे उपराजरूपाल होरें नमिएं काहडें च शानदार उपलब्धि हासल करने ताई 15एं ब'रें दे करमान सिंह गी बधाई दित्ती ते भविक्ख ताई शुभकामनां दित्तियां। चेता होग जे योद्धामल पब्लिक स्कूल जम्मू दे 10मीं दे विद्यार्थी करमान सिंह नै इक नमां स्मार्ट कुड़ेदान तैआर करियै ब्रिटिश पेटेंट हासल कीता ऐ। एह कुड़ेदान इक पूरी-पराती प्रणाली ऐ जेहदे च एहदी स्थिति ते भरोचने दी सतह जनेह स्वचलित पैहलु मजुद न जिंदे कन्नै बेल्ले सिर कुड़ा करकट किट्टा करने ते पर्यावरण गी साफ रखने च मदाद होंदी ऐ।

<><><><><><>

Cyber Crime

उपरोतली बधदी जा'रदिएं साइबर अपराध दिएं चुनौतिएं बारे आम लोकें टकोहदा करियै नोजवानें गी सौहगा करने दे मकसद कन्नै भारतीय फौज आस्सेआ राजौरी जिले दे साज इलाके च इक जागरूकता संवाद दा

सरिस्ता कीता गेआ। इस गल्लबात दरान लोकें गी दस्सेआ गेआ जे किश चाल्ली अपराधिक मानसिकता आले लोक अूनलाइन फ्राड करी सकदे न, उंदे कन्नै पैहे दी ठगी होई सकदी ऐ, बच्चें जां महिलाएं दा उत्पीडन होइ सकदा, सोशल मीडिया राएं गै लोकें गी डराई घमकाइयै पैहे दी वसूली जां कोइ गलत कम्म करने लेई मजबूर कीता जाई सकदा ऐ। इस करियै किस चाल्ली ऐसी स्थिति कोइ बचना ऐ एहदे बारे लोकें गी समझाया गेआ तां जे ओ कुसै बी चाल्ली दे साइबर अपराधिणं दे जाल च नेई फसन।

<><><><><><>

Army Porter

रियासी जिले च मारे गेदे सेना दे पिट्टू चांद सिंह दे पिता राज सिंह दा जीवन, परिवार लेई इक्कले रूट्टी कमाने आले पुत्तर दी मौत दे बाद भलेआं मोहाल होइ गेदा ऐ। इस पिछड़े तबके कन्ने ताल्लुक रखने आले इस परिवार लेई फौज नै मुआवजे राएं मदद करने दी कोश्ट कीती ऐ जेहदे लेई राज सिंह नै फौज दा दिली आभार प्रगट कीता ऐ।

<><><><><><>